

ՄՈՒԿԻԿԻ ՄԱՀԸ

Ծիտիկն ու Մուկիկն ախպերացան: Գետի
ափին բուն շինեցին, մտան մեջը:

Մի օր Ծիտը գնաց քուջուջ անելու, ետ
եկավ, տեսավ Մուկիկը մեռել է: Ծնկանը զարկեց.

5 — Վա՛յ, ախպեր ջան, վա՛յ...

Օխտը ճամփի մեջտեղ նստեց, հողը
փորեց, տվավ գլխին.

— Վա՛յ, ախպեր ջան, վա՛յ...

Ձենի վրա կորիկն եկավ.

10 — Ծիտիկ-միտիկ, շալփետուրիկ,

Հողն ինչո՞ւ ես տալի գլխիդ:

— Թաո՛ւ, թաո՛ւ,— ասավ Ծիտը,—

Ես որ շտամ, ո՞վ տա հապա.

Մուկիկի պես ախպեր մեռավ,

15 Աշխարհքն էսպես մնաց անտեր,

Ես որ հողը տամ իմ գլխին,

Մե՞ծ բան է...

— Ափսո՛ս, ափսո՛ս,— ասավ կորը,—

Մուկիկի պես մարդը մեռավ,—

20 Ասավ, իրեն էնքան զարկեց,

Թւը կոտրեց, կախ արավ:

Ծառը ասավ.

— կորիկ քուրիկ, ճըտճըտուրիկ,

Ինչո՞ւ ես մի թւըդ կոտրել:

25 — Բա ի՞նչ անեմ, որ չըկոտրեմ:

Մուկիկի պես մարդը մեռավ,

Աշխարհքն էսպես մընաց անտեր.

Ծիտը գլխին հող է տալի,

Ես որ իմ մի թւը կոտրեմ՝

- 30 Մե՛ծ բան է...
— Ա՛խ-վա՛խ, ա՛խ-վա՛խ,— կանչեց ծառը,—
Մուկիկի պես մարդը մեռնի՞...
Գընաց եկավ, գընաց եկավ,
Իր ճյուղերը զարկեց իրար,
35 Զարդեց, մընաց ճըղնակոտոր:

- Քարերն ասին.
— Ծառիկ-մառիկ, կանաչ թառիկ,
Ճյուղերդ ինչո՞ւ վեր թափեցիր:
— Վա՛հ, ձեր տունը Աստված շինի,
40 Մուկիկի պես մարդը մեռավ,
Աշխարհքն էսպես մնաց անտեր.
Ծիտիկն էնտեղ հողը գըլխին,
Լորը իրեն թևը կոտրած,
Իմ ճյուղերը ես որ թափեմ՝
45 Մե՛ծ բան է...

- Հազար ափսո՛ս — քարերն ասին.
Մուկիկի պես մարդը մեռավ,
Ու գոռալեն, գըռգըռալեն
Գըլորվեցին սարերն ի վար,
50 Թափվեցին ցած — ջըրերի մեջ:

- Ջըրերն ասին.
— Ի՛նչ պատահեց, ա՛յ գիժ քարեր,
Չէ՞ դուք ձեր տեղն անժաժ էիք,
Ի՛նչ էք էդպես ցած գըլորվում:
55 — Էլ ի՛նչ անժաժ. բա չե՞ք ասիլ,
Մուկիկի պես մարդը մեռավ,
Աշխարհքն էսպես մընաց անտեր,
Ծիտիկն էնտեղ հողը գըլխին,

Լորիկն իրեն թևը կոտրած,
60 Ծառը մընաց ճըղնակոտոր,
Մենք մեր տեղից որ գըլորվենք՝
Մեժ բան է...

— Վա՛շ-վի՛շ, վա՛շ-վի՛շ, ի՛նչ իմացանք,
Մուկիկի պես մարդն էլ մեռնի՞...
65 Զըրերն ասին. խառնըվեցին,
Ու գընացին պըղտոր-մըղտոր:
էն կողմերից տըմտըմբալով
Պառազն եկավ: էս որ տեսավ.
— Ա՛յ գըլգըլան ջըրեր,— ասավ,—
70 Դուք պարզ էիք միշտ ու մարմանդ,
Ինչո՞ւ էսօր պըղտորվեցիք:

— Վա՛յ քու տունը քանդվի, պառա՛վ,
Բա չե՞ս լըսել՝ ինչ է եղել.
Մուկիկի պես մարդը մեռավ,
75 Աշխարհքն էսպես մընաց անտեր,
Ծիտը էնտեղ հողը գըլխին,
Լորը իրեն թևը կոտրած,
Ծառը էլած ճըղնակոտոր,
Քարերը ցած գըլտոր-մըլտոր,
80 Մենք պղտորվենք՝ մեժ բան է...

— Հողն իմ գլխին,— պառազն ասավ,—
Մուկիկի պես մարդը մեռնի՞...
Զարկեց իրեն ու ծըվատեց,
Երեսն արավ արյունլըվիկ,
85 Մազաքըձուձ՝ գյուղը վազեց:
Գյուղում ասին.
— Պառավ տատիկ, ի՛նչ պատահեց.

Ինչո՞ւ երեսդ արյունը վիկ:

– Վա՛յ, քոռանամ, մի խոսեցնեք:

- 90 Մուկիկի պես մարդը մեռավ,
Աշխարհքն էսպես մընաց անտեր,
Ծիտը էնտեղ հողը գըլխին,
Լորը իրեն թևը կոտրած,
Ծառը եղած ճըղնակոտոր,
95 Քարերը ցած գըլտոր-մըլտոր,
Ես իմ երեսն արյունոտեմ՝
Մե՛ծ բան է...

– Ափսո՛ս, ափսո՛ս, հազար ափսոս,
Որ էն տեսակ մարդը մեռավ...

- 100 Ափսոսացին էն գյուղացիք,
Սև կապեցին, սուգ նստեցին,
– Վա՛յ, ո՞վ ասավ, ո՞վ ասավ...
– Հողագըլուխ Ծիտիկն ասավ,
Թևը կոտրած Լորիկն ասավ,
105 Ճըղնակոտոր Ծառիկն ասավ,
Գըլտոր-մըլտոր Քարիկն ասավ,
Պըղտոր-մըղտոր Զըրիկն ասավ,
Մագաքը ձուձ Պառվիկն ասավ,
Մեր Մուկիկը մեռել է...
110 Էլ ո՞վ մընաց էս աշխարհքում,
Էլ ի՞նչ ապրենք էս աշխարհքում...
էսպես ասին
Ու միասին
Լացով, կոծով,
115 Ճիչ-գոռոցով
Հավաքվեցին ու գընացին,
Քարիցն ընկան, կոտորվեցին: